



Minggu, 15 November 2020
Ogen: Matius 7:21-23



Megi Ras Ndalanken



Ibas sada gedung Gereja si megah, lengkap alat musik ras multimedia si canggih. Enterem kalak si erkebaktin ku je banci seh seribu kalak sekali kebaktin. Jadwal kebaktin mingguna lit 3 kali I bas wari minggu e, lenga ka jadwal kebaktin di luar wari minggu. Pengkhotbah bas teptep mingguna Pendeta si nuriken kata Dibata alu semangat (berapi-api), ende-enden si ni endeken pe meriah, emaka terbegi rusur surak-surak si meriah i bas rumah pertoton e. Kenca ndarat kebaktin minggu, sekalak-sekalak nepet mobilna lanai lit tegur sapa sada ras si debanna, mis tutup mobil naiken kaca emaka lanai lit si ngidahsa darat nari. Si mada mobil e ngenca banci ngidah kalak si idarat. I bas ndalani wari-wari, la lit idah bedana si erkebaktin minggu ndai ras si la erkebaktin minggu, lagu langkahna pe bali, penampilenna pe bali, ndalanken kata Dibata e kerina samar-samar, abu-abu, la jelas. Lanai teridah geluh si sampar-sampaten, si alemen salah, ermediate man sekelewet. Rajin erkebaktin tapi la teridah bas perbahanen si teptep wari. Rikutken temanta wari enda, ‘megi ras ndalanken,’ teridah min perbahanenta mehuli arah kita megiken kata Dibata i bas rumah pertoton e nari. Nina Pd.t Joas Adiprasetya, ibadah e situhuna labo tupung kita erkebaktin i bas rumah pertoton tapi kenca kita ndarat i bas rumah pertoton e nari. Situhuna tupung kita ndarat i bas gerbang rumah pertoton e i je me mulaina kita ibadah. Ertina kai ndai si ibegiken kita arah kotbah bagepe puji-pujinta arah ende-enden, si praktekken me i darat rumah pertoton. Banci e i rumahta, i tiga, i kantor, i juma, i bas perdalanen, ras i japa pe kita. Nggeluh si keleng-kelengen, si sampat-sampaten, nggit ngalemi salah, lanai erelem-elem, ermediate man sekelewet, nggeluh bujur, tutus, ertanggungjawab, pang ngataken si benar, ras ngelakoken kebenaren, enda si dalanken bas geluhta si teptep wari. Setia er-Dibata dengen ngelakoken penembahen alu payo enda kerina silakoken i darat rumah pertoton. Emaka ibadahta si tuhuna eme kegeluhenta si teptep wari. Emaka ipandang Jesus kalak si terjeng megi-megi, tutus ku rumah pertoton tapi la teridah ndalanken kata Dibata. Nina Jesus, Labo kerina kalak si erlebuh man bangKu, O Tuhan, Tuhan! Bengket ku bas kinirajan Surga, Tapi kalak si ngelakoken rikutken si ngena ate BapangKu.